

Na osnovu člana 29. tačka 7)., Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj: 39/03, 22/06 i 43/10), člana 31. stav (2)., tačka 3), i člana 32. Pravilnika o načinu rada i funkcionisanja štabova i povjerenika civilne zaštite ("Službene novine Federacije BiH", broj: 77/06 i 5/07), u skladu sa članom 11., alineja 18), i članom 34. tačka 6)., Statuta Grada Zenica ("Službene novine Grada Zenica", broj:5/15), na prijedlog Štaba civilne zaštite Grada Zenica, Gradonačelnik donosi

ODLUKU

o proglašenju stanja prirodne nesreće, zbog poplava i klizišta, na teritoriji Grada Zenica

I

Proglašava se stanje prirodne i druge nesreće na području (teritoriji) Grada Zenica zbog obilnih kišnih padavina koje su prouzrokovale izlivanje rijeke i potoka, iz svojih korita, pri tome izazivajući plavljenje velikog broja stambenih, infrastrukturnih objekata i poljoprivrednog zemljišta, te pokretanje kliznih procesa na teritoriji Grada Zenica

II

U cilju poduzimanja neophodnih mjera zaštite i spašavanja ljudi i materijalnih dobara, ugroženih djelovanjem prirodne nesreće, na teritoriji Grada Zenica, potrebno je:

- što prije izvršiti neophodne mjere i radnje kako bi se sve službe za upravu Grada Zenica, upravne organizacije, pravni subjekti i ostale institucije stavili na raspolaganje Štabu civilne zaštite, Grada Zenica (u daljem tekstu: Štab cz), te da se obezbijedi aktivacija i svih mjesnih štabova cz (štabovi cz po slivovima) koji će se, po potrebi, u skladu sa planovima zaštite i spašavanja ljudi i materijalnih dobara, koristiti na ugroženim područjima;
- zbog neophodnosti efikasnog izvršavanja naredbi Štaba cz, odnosno ispunjavanja svojih obaveza, svi subjekti navedeni u prethodnoj alineji, ove odluke, dužni su uvesti pasivna dežurstva;
- štab cz se zadužuje da HITNO izvrši angažovanje (aktiviranje) odgovarajućih službi za zaštitu i spašavanje Grada Zenica, a po potrebi i drugih pravnih subjekata, radi pružanja pomoći gdje se za to ukaže potreba, odnosno na ugroženim područjima;
- u skladu sa procjenom situacije, te u slučaju, eventualne, nemogućnosti stavljanja situacije pod kontrolu i adekvatnog otklanjanja svih opasnosti pomoću sopstvenih raspoloživih snaga, Štab cz se obavezuje da u skladu sa svojim ovlaštenjima traži podršku i pomoć od viših institucija vlasti zaduženih za provođenje mjera zaštite i spašavanja, kako bi se izvršilo dodatno angažovanje snaga i sredstava (kantonalne, Federalne) radi pružanja podrške i pomoći na ugroženim područjima.

III

Svi troškovi, koji nastanu, na bazi angažovanja tokom provođenja mjera zaštite i spašavanja i obavljanja poslova u cilju zaštite i spašavanja ljudi i materijalnih dobara na ugroženom

području, snosit će se iz sredstava Budžeta grada Zenica, planiranih za zaštitu i spašavanje, odnosno, u skladu sa važećim propisima, za ove namjene potrebno je koristiti raspoloživa finansijska sredstva prikupljena po osnovu posebne naknade za zaštitu i spašavanje, a u skladu sa Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća ("Službene novine Federacije BiH", broj:4/12 i 80/13), kao i po potrebi, u slučaju nedostatka finansijskih sredstava, tražiti pomoć od viših institucija vlasti;

IV

Štab cz se zadužuje da u skladu sa svim važećim i utvrđenim zakonskim i podzakonskim odredbama preuzme sve aktivnosti vezano za koordinaciju i rukovođenja akcijama zaštite i spašavanja ljudi i materijalnih dobara na ugroženom području.

V

Obavezuju se svi rukovodioci službi (pomoćnici gradonačelnika) i ostalih upravnih organizacija, pravnih subjekata i institucija, da osiguravaju adekvatno i promptno provođenje svih naredbi Štaba cz, uz pružanje svih neophodnih vrsta pomoći (logistička podrška, komunalne potrebe, evakuacije, zbrinjavanje ugroženih i stradalih, snabdijevanju stanovništva neophodnim živežnim namirnicama, higijenskim potrepštinama i sl.) kako bi se olakšalo provođenje svih neophodnih mjera i izvršavanja poslova u cilju što efikasnije zaštite života i materijalnih dobara.

VI

Zadužuje se Komisija za procjene šteta, Grada Zenica, da u što kraćem roku organizuje i provede mjere, iz svoje nadležnosti, te u skladu sa utvrđenim pravilima i svojim ovlastima izvrši aktiviranje u cilju procjene šteta na ugroženom području.

VII

Ova odluka stupa na snagu danom donošenja i ista će se objaviti u Službenim novinama Grada Zenica.